



PERAG ?


Gant Emonik KOARER (Kalon-Dan)

*Perag, a hed an noz, pa 'z eo du pog an Nenv,
Pa gan er c'hoajou bras mouez iud an avel grenv,
Perag, ô ma Ene, perag beza ken trist
Evel e oa gwechall ene poanuis ar C'hrist ?*

*Perag, a hed an deiz, dindan lintr an Heol aour,
Pa 'z eo glaz moug an Nenv, perag ez oun ken paour ?
Ha perag ma c'halon, torret gant hircvoudou,
A c'halvfe ar Maro, skeud ha rieu an Ankou?*

*Perag na vezan ket vel an holl dre ar bed ?
Oh! Beza evurus gant Karantez bepred...
Mez Iôr na roaz d'in nemet tristidigez,
Anwazus a vezo da viken ma buhez...*

Naoned.



Rimoustadennou Mam-Goz

Gant JANNEDIK

I. — HUSKELLEREZ (da gana d'ar bab da gousket).

*Disul me oa pinvidik
Me moa prenet eur c'hogik
Kok kok kok a re ma c'hok
Rampanplaon, mignonik.*

*Disul me oa pinvidik
Me moa prenet eur iarik,
Krak krak krak a re ma iar,
Kok kok kok a re ma c'hok
Rampanplaon, mignonik.*

*Disul me oa pinvidik
Me moa prenet eur c'hazik,
Miaon miaon miaon a re ma c'haz,
Krak krak krak a re ma iar,
Kok kok kok a re ma c'hok
Rampanplaon, mignonik.*

*Disul me oa pinvidik
Me moa prenet eun hoc'hik,
Hoc'h hoc'h hoc'h a re ma hoc'h
Miaon miaon miaon a re ma c'haz,
Krak krak krak a re ma iar,
Kok kok kok a re ma c'hok
Rampanplaon, mignonik.*

*Disul me oa pinvidik
Me moa prenet eur veuc'hik,
Moun moun moun a re ma beuc'h
Hoc'h hoc'h hoc'h a re ma hoc'h
Miaon miaon miaon a re ma c'haz,
Krak krak krak a re ma iar,
Kok kok kok a re ma c'hok
Rampanplaon, mignonik.*

— 25 —

*Disul me oa pinvidik
Me moa prenet eur marc'hik,
Hi hein han a re ma marc'h,
Moun moun moun a re ma beuc'h,
Hoc'h hoc'h hoc'h a re ma hoc'h
Miaon miaon miaon miaon a re ma c'haz,
Krak krak krak a re ma iar,
Kok kok kok a re ma c'hok
Rampañlaon, mignonik.*

(Ha delc'hen da brena lonedigou ken e chom kousket ar bab).

II. — KONTADEN MAC'HARIT HAG AR BLEI

(da lavaret d'ar vugale brasikoc'h).

Eur wech a oa, eur wech na oa ket, hag eur wech a oa bepred.

Eur wech, Mac'harit a oa oc'h oza krampoez war ar billik, pa zeuaz eur blei braz en ti dre doull ar prennestr us d'an dol.

Eur bodezad laez a oa war al leur-zi, hag ar blei a lipaz anei tout, ha goude-ze ec'h eaz da vond kuit dre lec'h a oa deut, nemet e gof a oa teoet, ha na oa ken evit tremenn dre doull ar prennestrik bihan. Mac'harit heb koll he fenn a dapaz eur gastolodennad dour bervet a oa eno war an oaled hag a sklapaz anei gant rer ar blei. Poac'het ken a iude, ar Blei a choukaz war e gollierou, hag a zeuaz a benn da redek e maez.

Eiz de bennag goude, e oa Mac'harit o vesa he denved er Warem Greiz, pa zigouezaz d'ar Blei braz skotet tremenn dre eno gant e gonsorted.

— Ha! emezan d'ê, sell aman Mac'harit he doa skotet ma rer d'in an de all, bremaik me hi debro.

Mac'harit a oa plac'h di-lui, ha hi o krapat er wezen a oa eno. Ar Blei braz a lavaraz d'e gomprien :

— Gramp skeul verr, ha ni hi zapo.

Ha hen d'an traon tre, hag ar re all an eil war gein egile war grec'h. Mac'harit a vije tapet hag a vije debret.

Met Mac'harit a oa fin.

Hi ha kluchat ha leuskenn ar pezh a zour he doa war ar Blei braz a oa d'an traon, hag an dour o koueza war ar plas gwiridik, a lakaz ar Blei da grial fors ;

— Dour tom ! Dour tom ! emezan.

Ha tec'hout a zindan ar ber, ha tout ar bleizi da eilpenna an eil dreist egile, ha leun a spont rag an dour tom hi da redek ac'hanê buana ma c'hellent.

Mac'harit a ziskennaz neuze deuz ar wezen, hag a zigasaz he denved d'o c'hraou.